

Dithero tsa Tirelano mo Kutlwanong

03/2016 Thero ka Sontaga wa 3 mo sebakeng sa Adfente, e le ka 13. 12. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go Jes. 40:3.10: **“Baakanyang tsela ya Morena. ... Bonang Morena, Modimo wa lona o e tla ka thata!”**

1. Sefela sa 47 – 45/47

2. Thapelo: Morena Jesu Keresete, re a go leboga, ka o arabile potso ya ga Johane Mokolobetsi ka go itshenolela gore o Modirafatsi wa ditsholofetso tsa Jesaya 35, fa o rata gore batho ba dumele ka tlhomamo gore go sego ke yo o sa kgopisiweng ke wena, fa e le yo o dumelang gore o tlele mo lefatsheng go baakanyetsa batho botlhe boitshwarelo jwa maleo le go pholosa botlhe ba ba dumelang mo go wena. Gape re a leboga, ka o romile baapostolo, bapšopi, baruti le bareri botlhe go nna batlhanka ba gago le balebeledi ba masaitsiweng a Modimo. Ke gona re go kopang gore badumedi botlhe ba gago, bogolo badiredi ba lefoko la gago ba ikanyege mo tumelong le mo ditirong tsa bone. Re kopa jalo ka ntlha ya botsalo, loso le tsogo ya gago. Amen.

3. Lefoko la Testamente e kgologolo le kwadilwe mo go Jes. 40:1-11;

Epistolo ka fa thulaganyong ya 4 e kwadilwe mo go Baroma 15:4-12;

Efangele ka fa thulaganyong ya 1 e kwadilwe mo go Matheo 11:2-10.

4. A go ipolelwe tumelo ya bokeresete!

5. Sefela sa 48 – 46/48

6. Thapelo ya mmadi wa thero.

7. Epistolo ka fa thulaganyong ya 2 e kwadilwe mo go mo go 1 Bakorinthe 4:1-5, e re: "A motho mongwe le mongwe a re kaye jaaka re le batlhanka ba ga Keresete le balebeledi ba masaitsiweng a Modimo. Mme kana go batlega mo go bone balebeledi gore mongwe le mongwe a fitlhelwe a le boikanyo. Mme mo go nna ke selo se sennyennye go ka atlholwa ke lona gongwe ka katlholo ya batho: Ee, le nna ka nosi ga ke ikatlhole; gonne ga ke itemoge sepe, mme ga se gore ke kaiwe mosiami ka go re jalo: yo o nkatlholang ke Morena. Ka moo he, lo se ka lwa atlhola sepe, e ise e nne nako, go ya Morena a tle yo o tla ntshetsang leseding tse di fitlhilweng tsa lefifi, a senola maikaelelo a dipelo; foo mongwe le mongwe o tla bona poko mo Modimong." Amen.

8. Thero: Barategi mo Moreneng wa rona Jesu Keresete, ka Efangele ya Sontaga wa 3 mo sebakeng sa Adfente re utlwa gore Johane Mokolobetsi yo o neng a romelwa go baakanyetsa Morena tsela ka go biletsa batho mo tllhabologong o ne a latlhelwa mo kgolegolong, a dira ka botlhale jwa morongwa wa Modimo, a sa leke go araba ka nosi potso e e reng: “Jesu, a ke wena yo o tlang, a kampo re lebelele o sele?” Johane o romile barutwa ba gagwe gore ba ye ba botse

Jesu ka nosi. Ba utlwile mo Moreneng ka nosi, fa e le Modirafatsi wa ditsholofetso tse di kwadilweng mo go Jesaya 35, fa e le Mothusi wa ba ba bokoa, le Moreri wa kgololesego, fa o tlile go nna Mogolodi wa bagolegwa botlhe, e le bagolegwa ba boleo, loso, le Satane.

Ka lefoko la thero ya Kajeno e e leng Epistolo ya Sontaga wa kajeno re utlwa, fa e ruta gore

1. Jesu Keresete ke Morena, Moatlhodi le Mmueleli wa rona;
2. Baapostolo le balatedi ba bone mo tirong ke batlhanka ba ga Keresete, le balebeledi ba masaitsiweng a Modimo.

1. Ka thuto ya ntlha ya lefoko la thero ya kajeno re utlwa gore **Jesu Keresete ke Morena, Moatlhodi le Mmueleli wa badumedi**. Go utlwala sentle, fa Jesu Keresete e le Morena, gonne lefoko le re: Baapostolo ke batlhanka ba gagwe. Fa e le batlhanka, Keresete ke Morena wa bone. Ke se re se ipolelang ka mafoko a tlhaloso ya Artikele ya bobedi e e reng: “Re dumela gore Jesu Keresete ke Morena wa rona. Go rewa ene yo e leng “Modimo ruri yo o tsetsweng ke Modimo Rara ka bosena-tshimologo, yo e bileng e le motho ruri yo o tsetsweng ke Maria wa lekgarebe.” Ke ene Moatlhodi wa rona, ka e le yo o tla boang mo kgalalelong ya gagwe go athola batshedi le baswi. Ke ene yo o tla atholang le badiredi ba lefoko la Modimo, jaaka re utlwa Paulo ka go ipiletsa go atholwa ke Jesu Keresete, jaaka go kwadilwe gore “Mme mo go nna ke selo se sennyennye go ka atholwa ke lona gongwe ka katlholo ya batho: Ee, le nna ka nosi ga ke ikatlhole; gonne ga ke itemoge sepe, mme ga se gore ke kaiwe mosiami ka go re jalo: **yo o nkatlholang ke Morena**. Ka moo he, lo se ka lwa athola sepe, e ise e nne nako, go ya Morena a tle yo o tla ntshetsang leseding tse di fitlhlilweng tsa lefifi, a senola maikaelelo a dipelo.” Go bonala sentle gore katlholo e ntshitswe mo seatleng sa moapostolo le mo diatleng tsa batho botlhe. Ga go tlhokege gore re itshwenyegele ka go botsa gore re ikayang, gongwe batho ba bangwe ba reng, gongwe ba sebang ka ga rona gongwe ka ga tse re di dirang. Ke se se gomotsang thata, bogolo ka go utlwa le gore Moatlhodi yo e bile ke yo o tla dirang gore re buelwe ke ene, jaaka go kwadilwe gore “Foo mongwe le mongwe o tla bona poko mo Modimong ka fa le kwadilweng ka teng ka ga ba le babedi bale mo setshwantshong sa ditalente, ba ba dirisitseng sentle ditalente tsa bone, le fa e le yo o amogetseng ditalente tse tlhano gongwe tse pedi, Morena a raya mongwe le mongwe wa ba le babedi bao, a re: “Ahee, o motlhanka yo o siameng, yo o ikanyegang ... tsena mo boitumelong jwa Morena wa gago.” Gongwe re gopola ka fa le le kwadilweng ka teng ka ga badiri ba ba dirileng mo weineng ya Morena, fa Morena a bolelela motlameledi wa gagwe gore a abele ba ba dirileng ura e le nngwe fela le ba ba dirileng letsatsi lotlhe ka go tshwana gore re ithute ka katlholo eo gore rotlhe ba re dumelang mo go Keresete re atholelwa tshiamo ka go balelwa tshiamo ya ga Keresete ka go dumela mo go ene fela, e seng ka ntlha ya tse re di dirileng mo botshelong jwa malatsi otlhe, gongwe mo tirong ya go nna badiredi ba lefoko la Modimo, ke go re ka fa katlholong ya ga Jesu

Keresete ka go bulelwa ke ene ka ntlha ya bopelotlhomogi jwa boitshwarelo jwa maleo a rona mo leineng la gagwe, e seng ka go ikatlhola, le e seng ka go atholwa ke batho. Ke yona thuto ya ntlha ya lefoko la thero ya kajeno.

2. Ya bobedi e re: **“Baapostolo le balatedi ba bone mo tirong ke batlhanka ba ga Keresete, le balebeledi ba masaitsiweng a Modimo.”** Ke gona re itumelelang Morena yo o re amogetseng go nna batlhanka, gongwe badiredi ba gagwe, re gopola kaelo e batlhanka ba kaelwang ka teng mo go Tito 3 gore re ikokobeletse ditaelo tsa ga Keresete ka fa a ratang gore tiro ya gagwe e dirwang ka teng, re etleetsegele tiro nngwe le nngwe e e molemo, re se kgale ope, re se batle kgang, mme re nne bopelontle, re itshupe ka bonolo jotlhe mo bathong botlhe.” Se sengwe ke se: A re ikaeleleng go dira tiro ya rona ka go gopola gore baporofeti ba Testamente e kgologolo ba boleletswe go dira jang tiro ya bone, gongwe go itshola jang mo go yona, le barutwa ba ga Jesu ba rometsweng, le go dirang mo thomong ya bone, mo ditirong tsotlhe re fitlhelwe re le boikanyo ka fa lefokong la Epistolo ya kajeno le le reng: "A motho mongwe le mongwe a re kaye jaaka re le batlhanka ba ga Keresete le balebeledi ba masaitsiweng a Modimo. Mme kana go batlega mo go bone balebeledi gore mongwe le mongwe a fitlhelwe a le boikanyo.” Kajeno ga re kgone go tshwaya tsotlhe tse di umakiwang mo Beibeleng ka fa go kwadilwang ka teng gore badiredi ba lefoko la Morena ka fa ba tshwanetseng go dira le go itshola ka teng. Re setse re utlwile gore Morena o rata gore ba ikanyege mo tirong ya bone. Se segolo se se umakiwang mo lefokong la thero ya kajeno **ke fa badiredi ba lefoko e le balebelebi ba masaitsiweng a Modimo.** Masaitsiweng a Modimo a tlhalosiwa kwa le kwa gore go tlhaloganngwe sentle gore go rewang ka ona. Ke mafoko a a re kaelang gore badiredi ba lefoko ba ikokobetse, ba nne le masisi tota gore ba se ka ba leka go bua fela ka ga masaitsiweng a Modimo. Kana ga go na ope yo o itseng masaitsiweng a Modimo ka go anya monwana wa kgonotswe wa gagwe. Jaaka re sa ka ke re dumela mo go Jesu Keresete ka tlhaloganyo le thata ya rona, mme Mowa o o Boitshepo o re bitsa ka Efangele ya ga Keresete, le go re itshepisa ka boitshwarelo jwa dibe ka go dumela mo go Jesu Keresete, fela jalo ga re kgone go itse masaitsiweng a Modimo ka tlhaloganyo, botlhale gongwe ka nonofo ya rona, mme re tshwanetse go tlhokomela ka tlhoafalo e kgolo go ithuta lefoko la Modimo ka fa re senoletsweng mo go lona masitsiweng a ona ka teng. A re se ka ra tshwakgwafala mo tirong eo, mme re e tlhoafalele ka go ikanyega go baakanya thero, le dithuto tsa rona gore re itse ka nosi se se rewang ke lefoko le re le rerang, gongwe dithuto tse re di rutang. Dikwalo tsa Testamente e ntšhwa le tsa e kgologolo di tshwaya sentle gore Modimo o senolela masaitisiweng a ona jang gore re bue ka botlhale jwa Modimo jo e leng bosaitsiweng jo bo fitlhegileng, jaaka go kwadilwe gore “le gale botlhale re a tle re bo bue mo go ba ba botlalo, mme ga se botlhale jwa lefatshe leno, le e seng jwa balaodi ba lefatshe leno ba ba nyelelang.

Mme re bua botlhale jwa Modimo jo e leng bosaitsiweng, jo bo fitlhegileng, jo Modimo o sa leng o bo rulaganya pele dipaka di ise di nne teng go re isa kgalalelong, jo bo neng bo sa itsiwe ke ope wa balaodi ba lefatshe leno; gonne fa ba ka bo ba bo itsile, ba ka bo ba sa bapola Morena wa kgalalelo. Mme go ntse jaaka go kwadilwe ga twe: ‘Tse leitlho le sa di bonang, tse tsebe e sa di utlwang, tse di a tsenang mo pelong ya motho ke tsona tse Modimo o di baakanyeditseng bone ba ba o ratang.’ Mme Modimo o di re senoletse ka Mowa wa ona, gonne Mowa o tlhotlhomisa dilo tsotlhe, le tse di boteng tsa Modimo. Kana ke mang mo bathong yo o itseng tse di mo mothong, fa e se mowa wa motho o o mo go ene?

Le gona jalo ga go ope yo o itseng tse di mo Modimong fa e se Mowa wa Modimo. Mme rona ga re a tshola mowa wa lefatshe, re na le Mowa o o tswang mo Modimong gore re tle re itse dilo tse re di abetsweng ke Modimo; tse e bileng re di bolela, e seng ka mafoko a a rutwang ka botlhale jwa botho, mme e le ka a a rutwang ke Mowa o o Boitshepo ka go tlhalosetsa ba Mowa tsa Mowa. Mme motho wa nama ga a tshole dilo tsa Mowa wa Modimo; gonne di bosilo mo go ene ga a kgone go di tlhaloganya; gonne di ka atlholwa ka Mowa fela,” o o buang puo e e utlwalang sentle mo Lefokong la Testamente e kgologolo le ntšhwa ka maipolelo a kereke. Ke nnete go ne go sa itsiwe ka tlhaloganyo ya motho, fa yo o neng a bapolelwa mo sefapaanong e le Morena wa kgalalelo, fa botsalo jwa Morena Jesu Keresete, dipogo tsa gagwe, loso lwa gagwe, le tsogo ya gagwe di setse di baakantswe ke Modimo pele dipaka di ise di nne teng gore go baakanyediwe batho ba merafe yotlhe ba dipaka tsotlhe boitshwarelo jwa maleo, le botshelo jo bo sa khutleng jalo. Batho ba ne ba sa itse tseo, gape ka fa tlhagong ya bone ba di ganetsa mo go kalo gore Efangele ya sefapaano sa ga Keresete e kaiwe kgopiso ke Bajuda le bosilo ke Bagerika gongwe ke baditšhaba. Ba di amogela ka tumelo fela ka go dumela Lefoko le kwadilweng ka teng, fa Mowa o o Boitshepo o ba bitsa ka Efangele eo ya ga Jesu yo o kileng a bapolelwa mo sefapaanong, le go ba sedimosetsa ka dineo tsa ona tsa thero ya Efangele, tsa kolobetso, tsa boipobolo, tsa selalelo sa Morena.

Baapostolo ba ne ba tlhoafalela go di rera le go di ruta. A rona ba re leng balatedi ba baapostolo mo tirong ya bone, re ikwatlhayeng, fa go tlhokega tlhoafalo eo mo ditirong tsa rona! A rona ba re leng badumedi ba ga Keresete re ikwatlhayeng, fa go tlhokega tlhoafalo mo tumelong, mme bogolo re gomodiwe ka tse re di diretsweng ke Keresete ka botsalo, ka dipogo, ka loso, le ka tsogo ya gagwe. Re ikanyege mo tirong le mo tumelong, rotlhe re tlhoafalele mo thapelong go kopa gore molaetsa wa boitumelo jwa ga Jesu Keresete o phatlalediwe mo mafatsheng otlhe. Amen.

9. Thapelo: Rara, re a leboga, gonne o re rometse Morwao gore re nne le botshelo jo bo sa khutleng ka ntlha ya gagwe. Re kopa Mowa o o Boitshepo gore o re bolokele mo tumelong ya nnete ka metlha re ntse re tshela mo lefatsheng, le go re ruta go atlhola ka fa katlholong le

taolong e e siameng ya gago gore Efangele ya gago e rerelwe batho ba merafe yotlhe. Re rapela jalo mo leineng la ga Jesu Keresete. Amen.

Thapelo ya Morena: Rara wa rona yo o mo legodimong ...

10. Sefela sa 263 – 245/255

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke e E. A. W. Weber, ka ngwaga wa 2015

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.